

समे — 12:25

LG-Infra

केन्द्र सरकार आस्सेआ जम्मू कश्मीर केन्द्र शासक प्रदेश लेई 10 जहार 637 करोड़ रुपें दी लागत आली 19 शिड़क ते सुरंग परियोजनाएं दी मंजूरी थहोने पर उपराज्यपाल मनोज सिन्हा होरें आखेआ ऐ जे 296 किलोमीटर लम्बाई आलियां परियोजना सामारिक लिहाज कन्नै बी बड़ियां महत्वपूर्ण न की जे इंदे राएं दूर दरेड़े ते भलेया बन्ने कन्नै लगदे इलाकें च तैनात सुरक्षा बलें, सैनिकें ते फौजी ठकाने तगर जरूरी समेयान पजाने च बी मदद। उनें आखेआ जे इनें महत्वपूर्ण शिड़क ते सुरंग परियोजनाएं दी मदद कन्नै केन्द्र शासक प्रदेश दे दूर दरेड़े इलाकें च सैलानी थाहरे तगर बी लोकें दी सखल्ली पुज्ज जकीनी बनोग। उपराज्यपाल होरें इनें परियोजनाएं गी मंजूरी देने लेई प्रधानमंत्री नरेन्द्र मोदी ते केन्द्री शिड़क ट्रांसपोर्ट ते जरनैली शिड़क सरबन्धी मंत्री नितिन गडकरी हुंदा आभार प्रगट कीता। इनें परियोजनाएं च एनएच-701ए पर पीर की गली सुरंग परियोजना, एनएच-701ए पर जजनार शोपिया शिड़क परियोजना, लाल चौक थमां पारिमपोरा तगर कन्नो कन्नी चार गडिडएं दे लघने दी छमता आला फलाई ओवर, एनएच-701 पर त्रेहगाम चमकोट आले हिस्से पर शिड़क दा निर्माण, नरबल गुलमर्ग फलाई ओवर, काजीगुंड बाई पास ते शौपिया च राम्बियारा पुल दा निर्माण शामिल ऐ।

<><><><><><>

Dy CM-Mission Yuva

जम्मू कश्मीर सरकार दीयुवा उद्यमता सरबन्धी मती महत्वै आली पैहल, मिशन युवा, बारें इक जायजा बैठक कल श्रीनगर आले सिविल सचिवालय च लग्गी जेह्दी अध्यक्षता उपमुख्यमंत्री सुरिन्दर चौधरी होरें कीती। इस मौके मिशन डरैक्टर होरें इस कार्यक्रम तैह्त् कीते जा'रदे कम्म कारवाइएं ते उपलब्धिएं बारे जानकारी सांझी कीती। उनें आखेआ जे मिशन युवा गी जिने चार प्रमुख थम्में दी बुनियाद पर तैआर कीता गेदा ऐ, उंदे च संस्कृति, निवेश, छमता निर्माण ते संपर्क शामिल न। उनें आखेआ जे इस पैहल दा मकसद 1 लक्ख 3 जहार कोला मते उद्यम कायम करना ते 4 लक्ख 25 जहार कोला मते कम्म रोजगार दे मौके उपलब्ध करापस ऐ। उपमुख्यमंत्री होरें दर्ज उपलब्धिएं दी सराहना करदे होई सुझाह दित्ता जे मिशन युवा तैह्त् उपलब्ध कराए जाने प्रोत्साहने ते माली समर्थन च बाद्धा कीता जा तां जे नोजवान उद्यमता गी अपनाने लेई प्रेरत, प्रोत्साहित ते आकर्षित कीता जाई सकै।

<><><><><><>

Accident

राजौरी जिले च अज्ज बडलै चतियार-चिगस सड़कै पर पेश आए दे सड़क हादसे च दऊं जनें दी मौत होई गई ऐ ते 9 होरने दे घायल होने दी खबर ऐ। जानकारी मूजब एह हादसा उसलै पेश आया जिसलै इक टैंपू दी सामनेया आवा'रदे इक बड़्डी कन्नै टक्कर होई गई। हादसे च मरने आले दी पंचान धनवान कोट दी रौहने आली 26एं ब'रे दी इंशा फातिमा ते फतेहपुर दी बसनीक 50एं दी फरजाना बेगम दे तौरा पर कीती गई ऐ। हादसे च घायल सब्बने 8 जनें गी तुरत राजौरी दे सरकारी मैडिकल कालेज अस्पताल पजाया गेआ जित्थुआं गंभीर तौरा पर घायल दऊं जनें गी जम्मू मैडिकल कालेज मुंतकिल करी दित्ता गेआ ऐ।

<><><><><><>

Secy RDD

ग्रामीण विकास ते पंचैती राज मैहकमे दे सचिव मोहम्मद एजाज असद होर कल जम्मू कश्मीर ग्रामीण आजीविका मिशन दी इक जायजा बैठक दी अध्यक्षता करदे होई मिशन तैह्त् प्रमुख पैहलकदमिं दी अमलावरी, प्रगति ते उपलब्धिएं दी समीक्षा कीती। बैठक च मुख तौरा पर गल्लबात माली प्रगति, कम्म रोजगार, छमता निर्माण, संगठनात्मक मजबूती ते सरबन्धत होर केई विषयें पर कीती गई। एह्दे इलावा जारी लक्खपति दीदी कार्यक्रम तैह्त् हासल उपलब्धिएं दे बारे च जफसीली चर्चा कीती गई। सचिव होरें गर दस्सेआ गेआ जे जम्मू कश्मीर ग्रामीण आजीविका मिशन तैह्त् केन्द्र शासक प्रदेश च 7 लक्ख 55 जहार

ग्रामीण कुम्बें गी कवर करदे होई 94 जहार कोला मते आप सहायता समूह कायम कीमे गेदे न ते जम्मू कश्मीर दी गिनतरी इत्त भेठा बेहतर प्रदर्शन करने आले प्रदेशें च होंदी ऐ।

<><><><><><>

PM-MKB

प्रधानमंत्री नरेंद्र मोदी होर इस म्हीने दी 29 तरीक गी आकाशवाणी पर प्रसारित होने आहले अपने माहवार रेडियो कार्यक्रम “मन की बात” राएं देश—विदेश दे लोकें कन्नै अपने विचार सांझे करडन। एह इस कार्यक्रम दी 123मीं किशत होग। लोक इस कार्यक्रम लेई अपने विचार ते सुझा टोल फ्री नंबर 1800—11—7800 पर सांझे करी सकदे न।

<><><><><><>

Prog Announcement

आकाशवाणी दा क्षेत्रीय समाचार एकांश जम्मू ईरान च फंसे दे भारती नागरिकें गी मुख्य वापस आहने लेई सरकार आसेआ चलाए गेदे आपरेशन सिंधु बारै अज्ज 24 जून गी इक विशेष कार्यक्रम प्रसारित करोग। दिनें सांझे 12 बजे प्रसारित होने आहले इस कार्यक्रम च स्टाड़े परौहने होडन जम्मू—कश्मीर दे वरिष्ठ पत्रकार दिनेश मन्होत्रा जेड़े आपरेशन सिंधु ते मजूदा हालात बारै अपने विचार सांझे करडन। इन्दे कन्नै गल्लबात करडन। स्टाड़े न्यूज एंकर विजय बजाज ते अभिलाषा शर्मा। एह कार्यक्रम तुस स्टाड़े इस्सै चैनल पर मीडियम वेव 303 मीटर यानि 990 किलोहर्टज ते एफ.एम 100 इशारिया 3 मैगाहर्टज पर सुनी सकदे ओ। चेता रक्खेओ अज्ज दिनें सांझे 12 बजे।

<><><><><><>